



ӨҢІРАРАЛЫҚ ФОРУМ – ТИІМДІ ДИАЛОГ АЛАҢЫ

Қазақстан Президенті Ресейдің Астрахан облысының губернаторы Игорь Бабушкинді қабылдады. Бұл туралы Президенттің баспасөз қызметі хабарлады.

Кездесу барысында Қасым-Жомарт Тоқаев Қазақстан мен Ресей Федерациясы арасындағы стратегиялық және одақтастық қатынастардың қарқынды дамып келе жатқанын және екі ел өңірлерінің ықпалдастығы кеңейе түскенін атап өтті. Осы ретте Өңіраралық ынтымақтастық форумы тиімді диалог алаңына айналып отыр.

Қазір Атырау, Батыс Қазақстан, Маңғыстау және Қазақстанның өзге де облыстары Астрахан

облысымен көптеген бағыт бойынша өзара тиімді кооперацияны жүзеге асырып жатыр. Экономикалық белсенділіктің жаңғыруына орай шекара маңындағы сауда қарқыны біртіндеп қайта қалпына келіп жатқаны байқалады.

Қазақстан мен Астрахан облысының арасын негізгі байланыстырушы ретінде Ресей бойынша ең көп тұратын сол жердегі казак диаспорасы маңызды рөл атқарып отыр.

Президент Астрахан қазақтың тарихи Отанымен рухани байланыстарын нығайтуына, ата-бабаларының тілі мен мәдениетін сақтауына жан-жақты қолдау көрсетіп жатқаны үшін Игорь Бабушкинге ризашылығын білдірді.

Мемлекет басшысы қазақ халқының Бөкей хан, Құрманғазы, Дина Нұрпейісова және басқа да ұлы перзенттерінің есімін Астрахан жерінде ұлықтап келе жатқаны үшін аймақ әкімшілігі мен тұрғындарына алғыс айтты.



ОТАНДЫҚ ӨНІМ ҮЛЕСІ ӨЗЕКТІ

Мемлекет басшысы «Эни С.п.а.» компаниясының атқарушы директоры Клаудио Дескальциди қабылдады. Бұл туралы Ақорданың баспасөз қызметі хабарлады.

Кездесу барысында Қашаған және Қарашығанақ ірі мұнай-газ жобаларының жүзеге асырылуы жөніндегі жоспар қарастырылды. Президент Қасым-Жомарт Тоқаевқа жалғасып жатқан пандемия жағдайына қарамастан, Қашағандағы қазіргі жобалардың іске асырылу қарқыны сақталып отырғаны туралы баяндалды.

Клаудио Дескальцидидің айтуынша, мұнай өндіру ісін арттыру жөнінде бірқатар маңызды инвестициялық шешім қабылданған. Консорциум Қашаған кен орнын толыққанды игерудің тұжырымдамасын әзірлеп жатыр. Сондай-ақ газ өңдеу қуатын күшейту жұмыстары жалғасып жатыр.

Мемлекет басшысы энергетикалық бағыттағы инвестициялық жобаларды одан әрі жүзеге асыруға Қазақстанның баса мән беретінін айтты. Осы ретте, Президент отандық өнім үлесінің жоғары болуын қамтамасыз ету қажеттігіне назар аударды.

Бұдан бөлек, әңгімелесу барысында жер қойнауын игеру, геологиялық барлау жұмыстарын жүргізу және жасыл энергетика саласындағы жобаларды іске асыру мәселелері талқыланды.

АУЫЛ ӘКІМДЕРІН САЙЛАУ: САЯСИ ЖАҢҒЫРУДЫҢ ЖАҢА КЕЗЕҢІ



Өткен жексенбі күні елдің саяси өміріндегі елеулі оқиғаға куә болдық. 25 шілдеде алғаш рет елімізде ауыл әкімдерінің сайлауы өтті. Сөйтіп, Қазақстан қоғамы 2024 жылға дейін жалғасатын әрі уақыты келгенде ұдайы ұйымдастырылып отыратын жергілікті әкімдерді сайлау кезеңіне өтті. Биыл алғашқы 730 ауыл әкімін бұқара тікелей дауыс беру арқылы сайлады.

Негізі, кез келген мемлекеттің XXI ғасырдың бәсекесіне төтеп беретіндей деңгейде дамуына әсер ететін бірқатар фактор бар. Әрине, экономиканы дамытып, халықтың әл-ауқатын түзеу кезек күттірмейтін іс екені белгілі. Дегенмен бұқараның мемлекеттік басқаруға тікелей араласуы, елде наным-сенім мен сөз бостандығының, адам құқығының, соның ішінде сайлау

және сайлану құқығының сақталуы тәрізді мәселелер өзекті екені сөзсіз. Өйткені ағылшын саясаткері Уинстон Черчилльдің сөзімен айтсақ, адамзат бүгінге дейін ойлап тапқан жүйелерінің ішінде демократиядан тәуір ештеңе жоқ. Ал демократиялық қоғам құру – бір күннің ісі емес. Содан да шығар, кезінде Елбасы Нұрсұлтан Назарбаев та «алдымен

экономика, содан соң саясат» дейтін ұстанымның дұрыс екенін жиі айтатын. Әрі елді демократияландыру үрдісін тежеген емес. Кезең-кезеңімен саяси реформаларды жүргізе отырып, осынау қадамға алып келді. Ал Мемлекет басшысы Қасым-Жомарт Тоқаев әкімдер сайлауын елдегі саяси реформалардың жүйелі әрі батыл жалғасуын қамтамасыз етіп, «Қазақстан-2050» Стратегиясында межеленген басымдықты жүзеге асыруды бастады. Мұны ауыл әкімдерін сайлаудың саяси іргетасы, алғышарты ретінде бағалауға болады.

(Жалғасы 2-бетте)

Шетелден пәтер алғыңыз келе ме?

Қазақстандықтар шетелдік жылжымайтын мүлікке жаппай ақша салып жатыр. Бай қазақтар Сингапур, Ұлыбритания, АҚШ пен Дубай нарығын емін-еркін игеруде. Ал өзгелері, әсіресе әншілер мен блогерлер Испания, Түркия, Грузия, Ресейден қаптыр пәтер алып жатыр. Сөйтіп, олар осы елдердегі баспана бағасының шарықтауына ықпал етіпті. Біз жатжұрттық тұрғын үй нарығынан үлес алған отандастарымыздың пікіріне құлақ түрдік. Неге олар өзіміздің емес, өзге елдің экономикасына инвестиция құюды ұйғарды? Одан не ұтты, неден ұтылды? Жауап іздеп көрелік.



6 >>

Қазір қоржынымызда үш қола

Көптен бері көңілді алаңдатқан Токио Олимпиадасы басталып та кетті. Жұма күні жергілікті уақыт 20.00-де XXXII жазғы Олимпиада ойындары салтанатты жағдайда ашылды. Әлемнің спорт саңлақтары қатарында Қазақстан құрамасы 41-ші болып өткен кезде елімізден барған санаулы ғана делегат пен журналистер қол бұлғап тұрды. 206 мемлекеттің 6 000 атлеті қатысқан шеруде Қазақстан Туын боксшы Қамшыбек Қоңқабаев пен жеңіл атлет Ольга Рыпакова ұстап шықты.



8 >>



Серік ШӘПКЕНОВ,
Еңбек және халықты әлеуметтік қорғау министрі:
Азаматтарды әлеуметтік қолдау – қашанда бірінші орындағы міндет

Тәуелсіздік алғаннан бергі 30 жылда Қазақстан билігі халықтың әл-ауқатын жақсарту мәселесін ешқашан назардан тыс қалдырған емес. Еңбеккерлердің жалақысы, зейнеткерлердің зейнетақысы, студенттердің шәкіртақысы мен түрлі жәрдемақылар, төлемдер кезең-кезеңімен өсіріліп, ерекше қажеттілігі бар азаматтар мен әлеуметтік әлсіз топтардың өкілдеріне мемлекет ұдайы қамқорлық жасап келеді.

4 >>

Сақалды құрылыстың саны көп

Әлемдік пандемия ел экономикасына ауыр соққаны жасырын емес. Әсіресе, құрылыс саласын қос бүйірден қысқандай. Олай дейтініміз, Жамбыл облысында құрылыс нысандары уақытынан кешеуілдеуі былай тұрсын, біраз жобалар бойынша мердігерлер конкурсқа түсуге құлықты емес. Оған себеп – құрылыс материалдарының қымбаттап кетуі. Ал былтыр жоба жеңімпаздары атанған серіктестіктер мектеп құрылыстарын мерзімінде бітіре алмай, зар жылап отыр.

КӨП ЖЕРДЕ КӨЗБӨЯУШЫЛЫҚ ЖАСАЛҒАН

Ең әуелі көзге анық көрініп тұрған нақты фактілерге тоқтасак. Тараз қаласындағы Төле би даңғылы бойындағы Мектептен тыс жұмыс және балалар шығармашылығы орталығының құрылысын «ТаразҚұрылысИнвест» ЖШС былтыр шілде айында бастаған. Жоспар бойынша нысан қыркүйек айында пайдалануға берілуі тиіс болатын. Алайда мұндағы жұмыс көңіл көншітпейді. Себебі құрылыс жұмыстары бірінші қабаттан аспай, тоқтап қалған. Мердігер қаржылық қиындыққа тап болғаннан кейін бетон плиталарға тапсырыс бере алмаған. Нәтижесінде, қыркүйекте балаларды қарсы алады деген ғимараттың құр қанқасы тұр.

Дәл сондай №2 мектептің құрылысы да былтыр басталған. Мердігер «Талас құрылыс» ЖШС жоспарлы жұмысты 75-80 пайызға аяқтадық дегенімен көп нәрсе көзбояушылықпен жасалған. Мәсе-



лен, мектеп бөлмелері стандартқа сай емес. Асханасы да ыңғайсыз орналасқан. Жоғары қабаттарындағы жарық пен жылу жүйелері дәліздің төбесімен жүргізілген. Бұл қолайсыздық тудырып ғана қой-

май, оқушыларға қауіп төндіріп отыр. Бір сөзбен айтқанда, жобалауда көп кемшілік кетіп, мердігер әйтеуір «бітірдім» дей салған.

(Жалғасы 7-бетте)

